

REGIONAL NEWS BULLETIN

HEADLINES (MORNING)

- 1. Union Minister of State for Housing & Urban Affairs Pu Tokhan Sahu chuan sawrkar laipuiin scheme hrang hrang a duan chu mipuiten an chhawr tangkai theih nan thawktute tan la thar turin a chah.
- 2. NEC kaltlangin kum 5 chhungin Mizoramah Rs. vbch. 339.06 hu hmasawna hna thawh a ni.
- 3. Karnataka Chief Minister ni rei ber Siddaramaiah chuan nimin khan banna a thehlut a, state politics-a inhman chhunzawm a tum thu a sawi.
- 4. Union Home Minister Amit Shaha chuan rampawn atanga dankalha lo pem ru te zawngchhuak tur leh thawnlet turin sawrkarin theihtawp a chhuah a ti.



UNION MoS

Union Minister of State for Housing & Urban Affairs Pu Tokhan Sahu chuan sawrkar laipuiin scheme hrang hrang a duan chu mipuiten an chhawr tangkai theih nan thawktute tan la thar turin a chah.

Union Minister hian nimin khan Champhai District tlawhin Champhai Circuit House Conference Hall-a thuneitute nen an inkawmna ah Housing & Urban Affairs hnuaiia scheme Champhaia kalpui hrang hrang - Pradhan Mantri Awas Yojana - Urban leh, Deendayal Antyodaya Yojana - National Urban Livelihood Mission leh, Atul Mission for Rejuvenation and Urban Transformation hnuaiia hna kalpui hrang hrang leh hmalakna bakah harsatna chinfel dan tur ngaihthlak a ni a, Minister chuan sawrkar scheme hrang hrang, mipuiin an la hriat hnem tawk loh, tangkai pui theih deuh tur a awm teuh tih sawiin mipuiten hamthatna an hmuh theih hrang hrang hriih hre tam turin thuneitute a ngen a, mi tam thei ang berin an hlawkpui theih nan sawrkar hnathawkte tang turin a fuih bawk a ni.

(DIPR)



RESIGNATION

Tourism Director atana sorkarin a rawih nawn Pi R. Lalrodingi chuan nimin khan Tourism Director atang a banna a thehlut.

OSD to Chief Minister ni mek Pi Lalrodingi hian Chief Minister Pu Lalduhoma hnenah Tourism Director atanga a banna hi a thehlut a. Kutziaka banna a thehlulah hian Tourism sector hmasawna kal mek a thuanawp lohna tura Tourism Director hna chelhtir a nih lai-in MZP-te'n dodalin ni 3 lai hna kal thei lovin an siam tih a tarlang a. He mi chungchangah hian hna tithuanawptu leh sorkar pawhin duhsak uchuak anga lang thei thei tur a a awm reng chu dik thei lova a hriat thu a sawi a. Chuvang chuan Director Tourism hna atanga la sawn mai turin Chief Minister chu a ngen a. Director Tourism hi departmental officer post a nihna erawh humhim hram theih dan awm se tiin a ngen bawk a ni.

Pi Lalrodingi chuan a service tawp lam panga Tourism a dah a nih avangin lawmthu a sawi a. Dodalna nasa tak a awm avangin a ban thu Chief Minister hi a hriattir a ni.

He tih lai hian Pi Lalrodingi rawih nawn dodaltu MZP chuan Tourism department hnathawkte pisa kai tur dan chu an titawp nghal a. Sorkarin sorkar hnathawk pension tawh a rawih nawn emaw an hun a pawhsei sak reng reng chu an duh lova an dodal zel dawn thu an sawi a ni.

(Desk)



NEC-MIZORAM

NEC kaltlangin kum 5 chhungin Mizoramah Rs. vbch. 339.06 hu hmasawna hna thawh a ni.

NEC Official Press Release-in a tarlan danin, Finance Commission 15-na (2022-2026) chhung khan Schemes of NEC (SoNEC) leh NESIDS-Roads Programme hnuaiiah mipui hriselna, zirna, inkalpawhna kawngpui, Tourism, Agriculture leh thil hrang hrangah hmasawna hnalian tak tak thawh a ni a. Schemes of NEC hnuaiiah Rs. vbch. 123.83 sengin mihring leh ran hriselna lan kaihnhawih te, Bazar, zirna in, Cultural centre, infiamna leh khawtlang mamawh hmasawna ruhrel pawimawh tak tak din a ni a. Kuthnathawktute tan leilet siam, Alu chin, Vawk leh Ar vulh, Sangha dil siam, Kuhva hmun siam, Sapthei sawngbawl leh ranvulh kawnga hmasawna atan nasa taka hmalak a ni a. Pi leh pute sul hny hmun hlui leh Mizo culture humhalh turin Cultural Heritage Centre, Tourism Circuit, Ecological Park leh Cultural Infrastructure dangte siam a ni.

NESIDS-Roads Programme hnuaiiah Rs. vbch. 277.99 hu Road Project 6 kalpui a ni a. Heng zinga 2 chu zawh fel tawh a ni. Kawngpui siam zinga Saiha-Lungbun-Tlangnuam-Haka kawngpui chuan Mizoram chhim lam

District leh Myanmar ramri inkalpawhna tha zawk a siam bakah Sorkar laipuiin Act East Policy a duan tihhlawhtlinna pawimawh a ni.

(Desk)

<><><>

PACS LUNGLEI

Sorkar laipuiin ram hmasawn nih a tumna kawnga hmanraw pawimawh tak Cooperative hnuai Primary Agriculture Credit Society(PACS) chu Mizoramah chak taka kalpui a ni.

Kuthnathawktute dawmkan nana kuthnathawh leh a kaihnhawih tih hmasawn nan Cooperative society kaltlang hian Lungleiah pawh hmalak mek a ni a, RBI kaltlang kher lovin loneitu ten awlsam zawkin Loan an la thei a, Lungleiah hian PACS 4 awm in Zobawm Multipurpose PACS, Electric veng ami leh Cherhlun MPACS te chu Computerize a ni tawh a, NABARD kaltlanga tanpuina hi dawn niin tunah hian Zobawk 'S' ami leh Leitlang MPACS te chu tihfel leh tura ruahman a ni.

MPACS Zobawm ami Pu Joash Lalchhandama chuan MPACS chu thingtlangah a tangkai thu sawiin Loan lak nan bakah Custom hiring thlengin a kalpui theih a ti a, leitha leh damdawi tlawm a zawrh theih avangin an chhawr tangkai thu a sawi a ni.

<><><>

METH SEIZURE

Excise & Narcotics Department, 23rd Assam Rifles leh an thawhpui dangte chuan Nilaini khan Lawngtlai AOC veng-ah Methamphetamine Kg 9 leh gram 807 (mum nuai khat) an man.

Excise & Narcotics department thupuangtu Pu Peter Zohmingthanga sawi danin ruihlo neitu ni a puh mi pahnih - Lalrammuana (47) leh Lalrinpuia (44) Armed veng south, Aizawl-a khawsa ve ve ni a inchhalte an man tel bawk a. Methamphetamine phurhna atana an hman lirthei pawh hrensak nghal an ni. Methamphetamine te hi Lalrammuana leh Lianhmingthanga te hian Aizawl lam atanga la-in, Lawngtlaia hralhna tur an zawn mek lai niin an sawi.

Methamphetamine vanga mante hi Narcotic Drugs & Psychotropic Substances Act, 1985 (NDPS Act) hnuai thubuai siamsak an ni a, Lawngtlai District Court-ah hruai nghal an ni.

(Desk)

<><><>

MPCC

Mizoram Pradesh Congress Committee (MPCC) Treasurer Dr. Lalmalsawma Nghaka chuan India rama petrol leh diesel man sang zel chu mipuiin an tawrh nasat avangin ZPM sorkar chu tuialhthei atanga chhiah (cess) a lakte titawp rih turin a ngen.

Dr. Lalmalsawma hian nimin khan Aizawl Press Club-ah chanchinbumite kawmin, tuialhthei man sang zelin India ramah harsatna namen lo a thlen mek a. He'ng harsatna laka mipuite chhanchhuah hi mipuite mawhphurhna a ni lo a, thlan tlin sorkar-na chelh mek te mawhphurhna a ni, a ti. Tun hnai lawkah petrol leh diesel man vawi 4 tih san a nih thu sawiin Dr. Lalmalsawma chuan, cheng 8 dawnnin kar 2 chhungin a sang hman a, tih san zel tum a la ni bawk a ti a; Mizoram sorkarin petrol leh diesel man a tihsan atangin kawng siamna tur cheng nuai sang tam a khawnchhuak tawh a, hetihlai hian tuialhthei man ti sangtute hian sorkar atangin a thlawn vekin petrol leh diesel (free coupon) an dawng thung tih a sawi.

<><><>

DEAD BODIES

Mizoram sorkarin khual-khuua thite ruang phurh man a tumsakna, 'Assistance for Transportation of Bodies of Deceased Persons within Mizoram' kaltlangin tun thla chhung hian ruang 154 phurhna man atan sorkarin cheng nuai 10, sing 6, sang 3 leh 813 a pe chhuak tawh.

Ruang phurh man buaipuitu Social Welfare department chuan May thla kal mekah hian ruang 154 phurh man atana sorkarin cheng nuai 10, sing 6, sang 3 leh 813 a pek chhuah tawh thu a tarlang a. Ruang phurh man dilna hi online hmangin Ruangphurh App kaltlanga tih theih tawhin, tun thla bika ruang phurh man pek tawh 154 zinga 13 hi online kaltlanga dilna a ni.

Mizoram sorkar chuan ruang phurhna senso tur hi tangka kum 2024-25, 2025-26 leh 2026-27 atan budget-ah cheng nuai 500 theuh a dah a. Ruang phurh inkaihruaina in a tarlan danin ruang phurh tur chu a thlenna km. 20 aia hnai a ni tur a ni lo a. Km. 20 piah lamah chuan tu tan pawh hman theih niin, lirthei thlen theih chin a huam a ni.

(Corr : Johnny)

<><><>

MPF

Nimin khan Synod Committee Room-ah Mizoram People Forum (MPF) Governing Board an thukhawm a, President Rev. John Raldosanga'n a kaihruai.

Thukhawmah hian Rev. Lalramliana Pachuau, General Secretary in MPF hmalakna report a pe a. April 21, 2026- a Aizawl Municipal Corporation (AMC) Inthlana MPF chet velna leh hmalakna te thlirleta ni a. Inthlana thianghlim awm theihna tura Local Forum leh Constituency Forum te theitawp chhuah a an huamchung hneh taka

an vil chu lawmawm a ti a. Hmun thenkhatah MPF leh Political Party Thawhhona Thuthlung hriatchian tawklloh te pawh a la awm niin a lang a. Chutihrualin inthlanna tluang taka buatsaih a ni chu lawmawm a ti bawk.

Kumin chhova MPF hmalak dan tur ruahmanna te sawiho a ni a. Thalai leh zirlaite hnena Sawrkar tha (good governance) pawimawhna inzirtir te, Media chakna hman tangkai te bakah kawng hrang hranga hmalak dan tur te sawiho a ni.

(PR)

<><><>

MHIP LUNGLEI

MHIP Sub Hqtrs Lunglei chuan Lunglei District atanga tunhnaia Nurse tha chawimawina Florence Nightingale Award dawngtu Lalenthangi Hnamte, Tuichawng, Wellness Centre a thawk leh kum 2020-a he Award lo dawng tawh tu Pi Vanlalthuami, Health Worker, Health & Wellness Centre Theiriata lo thawk tawh te chawimawina leh lawmpuina an Office venglaiah hun an hmanpui.

Lunglei MHIP Sub.Hqtrs President Pi Lallianguiri chuan Nurse tha chawimawina dawng thei Lunglei District atanga an awm chu lawmawm an tih thu sawiin lawmpui nan pangpar, thuziak leh Rs 10,000 ve ve an hlan a ni.

(Thangmingliana Renthlei PTC Lunglei)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM MANN KI BAAT

Prime Minister Narendra Modi chuan Pathianni May ni 31 chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tum tum ami hi a tum 134-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

(Newsonair)

<><><>

KARNATAKA CM

Karnataka Chief Minister ni rei ber Siddaramaiah chuan nimin khan banna a thehltu a, state politics-a inhman chhunzawm a tum thu a sawi. Chanchinbumite kawmin Pu Siddaramaiah chuan Chief Minister thar tura an ruat chu sawrkar siam tura sawm turin Governor a hrilh nghal a ti a. Chief Minister tum hnih leh Oppositioni leader tum hnih lo ni tawh Siddaramaiah chuan state budget hi tum 17 a pharh tawh a. Congress Party high Command rawtna angin Chief Minister atang hian a bang a. Hetihlai hian Chief minister atana rinlawk D.K Shivakumar-a thawhpuite erawh an lawm hle a. Hruaitu pahnihte hian hmalak zel dan tur sawiho turin Delhi an pan nghal a ni.

(Newsonair)

<><><>

UNION HM

Union Home Minister Amit Shaha chuan rampawn atanga dankalha lo pem ru te zawngchhuak tur leh thawnlet turin sawrkarin theihtawp a chhuah a ti. Nimina Gandhinagar Lok Sabha bialchhunga hmasawna project cheng vaibelchhe 340 chuang hu a hawnaah he thu hi sawiin Pu Shaha chuan sawrkarin ramri venhim leh dankalha pemrukna nuai bo chu a ngai pawimawh hle a ti a. West Bengal sawrkarin ramria Border Security Force te tana ram hectare 600 lai mai an pe chu lawmthu a sawi bawk a ni.

(Newsonair)

<><><>